

sta, che 'l re dice di la fede di la Signoria, e che vol esser sempre unito etc. Parlò contra la letera sier Andrea Venier, el consier; li rispose sier Domenego Trivixan, el cavalier, procurator, savio dil consejo. Et fu preso la letera.

72. *A di 4.* Fo colegio di savij. Et morite sier Alvise Boldù, el più vechio zenthilomo di questa terra. Havia anni 99; ha visto so fiola, fiol di la fiola, fia dil fiol; et fio di la fia dil fiol di la fia, sì che à visto *usque in tertiam et quartam generationem*. Era dazier, homo di pocha autorità. Resta horra el più vechio sier Domenego Morexini, procurator, qual è prosperoso, ancora continua im pregadi, et va a tutti li parentadi di la terra.

A di 5. Fo gran consejo. Fu posto, per li consieri, non far più per seurtinio li provedadori a le biave, *imo* non habino più li ducati 300 haveano a l'anno, ma siano electi *de cætero* per 4 man di election, per 16 mexi, con li modi erano avanti. Ave 4 non sinceri, 220 di no, 907 di la parte. Et fu presa.

A di 6. Fo colegio di savij. Vene letere di Roma, il sumario dirò poi, *videlicet* di la morte dil cardinal Rechanati, zenoese, era di primi cardinali di Roma. *Item*, Santa Praxede stava malissimo. Et il cardinal domino Hadriano da Corneto era fuzito di Roma per dubito dil papa; et questo, perchè havia scripto al re de Ingaltera mal dil papa, et ditto mal dil re de Ingaltera al papa, et il re de Ingaltera havia mandato le propie letere di esso cardinal al papa, sì che fuzite di Roma.

Da Napoli. Si ave di certo naufragio, seguite a quelle fuste armate a Porto Venere, et certi brigantini armati a Napoli contra esse fuste, con somersion di 150 spagnoli etc. *Item*, dil partir di le galie nostre di Fiandra di Cicilia.

A di 7. La matiua vene in colegio sier Anzo'lo Malipiero, venuto capitano di Vicenza, et referi justa il solito. Laudato.

Et hessendo eri morto sier Domenego Marim, procurator di San Marco sopra le commissarie di *citra*, *juxta* la leze dil consejo di X, ozi, *licet* fusse la vezilia di Nostra Dona, fo chiamà gran consejo, et electo procurator sier Antonio Trun, el savio dil consejo, di balote 150 da sier Andrea Gritti. Et fonno a la balotatione numero 1428. Et compito di balotar le voxe, esso sier Antonio Trun, qual era a Santa Maria di Gratia a vespero, inteso il suo romagnir, vene a consejo e tochè le galte al principe e la Signoria, dicendo alcune parole, et accettò le chiave; poi si voltò e ringratiò el consejo, cossa nuova. *Tamen*, mi ricordo che sier Nicolò Liom, quando rimase

procurator, *etiam* lui vene a consejo, ma non ringratiò el consejo, *solum* tochè la man al doxe etc. Or, per più chiara intelligentia di quelli lezerano, qui soto sarano notadi quelli fono nominati procuratori.

Electi procurator di San Marco sopra le commissarie di citra canal, in luogo di sier Domenego Marin, a chi Dio perdoni.

Sier Polo Pixani, el cavalier, fo capitano a Padoa, <i>quondam</i> sier Luca,	502
Sier Francesco Bernardo, fo consier, <i>quondam</i> sier Pollo, procurator,	372
Sier Stephano Contarini, el consier, <i>quondam</i> sier Bernardo,	401
— Sier Andrea Gritti, fo podestà a Padoa, <i>quondam</i> sier Francesco,	807
Sier Nicolò Donado, el consier, <i>quondam</i> sier Luca,	334
Sier Lorenzo di Prioli, fo podestà a Cremona, <i>quondam</i> sier Piero, procurator,	346
Sier Alvixe da Molin, fo podestà a Padoa, <i>quondam</i> sier Nicolò,	505
Non. Sier Francesco Barbarigo, fo consier, <i>quondam</i> sier Giacomo,	
— Sier Antonio Trun, el savio dil consejo, <i>quondum</i> sier Stai,	776
Sier Lunardo Mocenigo, fo podestà a Padoa, <i>quondam</i> serenissimo principe,	624
Sier Antonio Loredam, el cavalier, fo savio dil consejo, <i>quondam</i> sier Lorenzo,	386
— Sier Andrea Venier, fo capitano a Padoa, <i>quondam</i> sier Liom,	795
Sier Zorzi Corner, el cavalier, fo podestà a Padoa, <i>quondam</i> sier Marco, procurator,	734
Sier Zuam Mocenigo, fo capitano a Cremona, <i>quondam</i> sier Piero,	360
— Sier Alvixe Venier, el savio dil consejo, <i>quondam</i> sier Francesco, <i>quondam</i> sier Alvixe, procurator,	750

Rebalotadi.

1428

Sier Alvixe Venier, el savio dil consejo, <i>quondam</i> sier Francesco,	605
Sier Andrea Venier, fo capitano a Padoa, <i>quondam</i> sier Liom,	602
Sier Andrea Gritti, fu podestà a Padoa, <i>quondam</i> sier Francesco,	676